


## ALAHADY FAHA-16 MANDAVANTAONA - TAONA B



*« Ary nony nivoaka avy tao antsambo i Jesoa dia nahita ireto vahoaka betsaka ka nangoraka azy »  
(Mk. 6: 34)*

Ry Kristianina havana, izao Alahady tsotra faha-16 mandavantaona izao no no hanamasinantsika ireo pretra izay manamarika ny fidirantsika amin'ny sinaoda. Mbola hisy fotoana hamakafakana ireo dinika maro samihafa tsy maintsy hiatrehantsika an'izany sinaody izany, izany hoe ny fankalazana ny sinaody. Mbola hisy fanokafana ny fanombohana hidirantsika amin'ny fiarahana mamakivavaky ny lalan'ny sinaody ka

Vakiteny I : Jer. 23, 1-6  
Tononkira : Salamo 22  
Vakiteny II : Efez. 2, 13-18  
Evanjely : Mk. 6, 30-34

amin'izay isika ny manoratra ny lohahevitra, ny fomba entina miasa sy kalendrie hiainana ary indrindra ny vavaka hanentana antsika. Ny zavadehibe dia samy folan-kevitra isika fa mila manao “nouveau départ”, Pantekoty vaovao isika tolagna ka hiroso mba ho EOY MISIONERA

VITA BATEMY KA IRAHINA HO TABERNAKLA VELONA. Ny faniriana sy ny tanjona dia mba hiroso ho génération Mpanorina tokoa manorina Fianakavian-janahary, ho fianakaviamben'Andriamanitra isika Jiaby ho FRATELLI TUTTI ho OLO ARAIKY ISIKA JIABY. Izany fanorenana izany araky ny efa fantantsika dia tsy maintsy vokatry ny fahavononana, samy fola-kevitra izay mitaky fahafoizana, faharetana, fahasahiana, fitiavam-bavaka sy fandraisana an-tànana. Ireo no toe-panahy hanampy antsika hiroso hameno ireo siny, sajoa saota, siny 6 araka ny hafatr'I Masina Maria : “Ataovy izay lazaina aminareo...” : mivavaka, mandalim-pinoana, mirotsaka, mikatroka, mivory, mandray an-tanana, mankalaza...

Ny fankalazana ataontsika amin'ny fanamasinana izay mbola hitohy amin'ny toerana hafa Amboangibe, Ambilobe izany hoe mahenika ny diosezy dia fambara lalina ho antsika. Matetika isika milaza fa tsy misy kisendrasendra fa ambaran'Andriamanitra amintsika tokoa ny sitrany afahantsika miroso. Azontsika lazaina fa ireo hohamasinina amin'izao ireo no « génération sinaody » raha nisy taloha teo « génération korontanavirus ». Izany hoe avy amin'ny KORONTANA isika no manao “départ vaovao” ka miditra amin'ny Pantekoty vaovao. Araka ny fantatsika, ny Pantekoty dia maniraka mandrakariva ka ianareo “génération sinaody” dia irahina ho EOY MISIONERA HO TABERNAKLA VELONA. Io indrindra no andrasana amin'izao sinaody izao. Ianareo no irahina hitarika ny Tolagna hiara-dia amin'ny olo jibaby amin'izao sinaody atombotsika izao. Fahasoavan-dehibe ho anareo satria tena expérience tsy manam-paharoa. Mampahatsiaro ny Konsily voalohany tany Jerosalema... Miandry anareo ny diosezy....

Ireo Tenin'Andriamanitra arosan'ny Eglizy amin'izao Alahady faha-16 mandavan-taona izao dia tena mifanaraka tokoa amin'izany dinika sy fampizarana natao amintsika izany, izay mampisongadina ny tanjon'ny Sinaody “hamelona ny vahoaka”. Hoy indrindra ny fotokevitra : « *Ary nony nivoaka avy tao an-tsambo i Jesoa dia nahita ireto vahoaka betsaka ka nangoraka azy* ».

Mananatra antsika tokoa i Jeremia ao amin'ny vakiteny voalohany, ny mpaminany dia mahalala ny sitrak'Andriamanitra ka manoro azy amin'ny vahoaka, tsy manao kobaka ambava fa milaza ny marina. Eto i Jeremia dia mampitandrina sy manao teny mafy amin'ireo mpiandry ondry tsy nahantanteraka ny asa nankinina taminy : *“Mila loza ny mpiandry manary sy manahaka ny ondry eo amin'ny kijanako, — teny marin'ny Tompo. Koa izao no lazain'ny Tompo, Andriamanitr'i Israely, ny amin'ireo mpiandry miandry ny vahoakako: Ny ondriko dia nahahakareo, naronjindronjinareo; tsy niahy azy ireo ianareo. Koa indro Aho kosa mba hiahy, hamelezako anareo, ny haratsian'ny nataonareo, — teny marin'ny Tompo”*

Ataoko fa tsy mila averina aminareo hohamasinina izany tenin'i Jeremia izany ary tsy ho anareo ihany fa ho anay Zokinareo. Raha maniry “départ vaovao” isika raha maniry Pantekoty Vaovao dia mazava io tenin'i Jeremia Mpaminany io. Mila fibebahana avy amintsika Lohan'ny Tolagna raha te hiroso isika. Fantatsika fa ny pretra dia manahaka an'i Kristy izay mpiandry ondry, nefa mifanohitra amin'izany ny voalazan'i Jeremia eto. Isika tsirairay dia anisan'ny mpiandry ondrin'ny Eglizy Olona Velona, mpiandry ondrin'ny fanahintsika isika ka loza ho antsika raha tsy mikarakara izany isika. Izany no dikan'ny fandraisana an-tànana, izany no dikan'ny fahasahiana, voalazantsika matetika tamin'ny dinidinika nataontsika.

Inona ny asan'ny mpiandry ondry azo anankinana ny Eglizy Olona Velona olon'Andriamanitra ?

*“Hanangana mpiandry ondry izay hiandry azy ireo aho”*, isika izao no mpiandry ondry hatsangan’Andriamanitra fa indrindra ianareo tanora izay averimberina matetika ny hoe niany ny hoavy fa tsy amaray, ianareo no génération mpanorina, ianareo no génération sinaoda, ianareo izay hohamasinina pretra, ianareo izao no hitarika ny sinaody ka hahatonga ny olona ho EOVI MISIONERA VITA BATEMY KA IRAHINA HO TABERNAKLA VELONA ho génération mpanorina Eglizy Olona Velona sy Eglizy Tranon’Andriamanitra. Izany no dikan’ny vokatry ny sinaoda irintsika hatomboka izao ka hametraka TOROLALANA PASTORALY ivelomantsika eo anivon’ny diosezy. Manomboka isika izao ka mety mbola manjavozavo ny ny lalan-kombana. Normaly izany ary izany no ilàna ny fiaraha-midinika. Izany no ilàna an’ireo fitaovana iasana handalinantsika ny zava-misy. Izany no izarazarana ireo dinika araka ny foto-kevitra aroso. Rehefa any amin’ny farany vao mandravona azy isika ka mametraka izay TOROLALANA PASTORALY na DIRECTOIRE PASTORAL.

Amin’ny Evanjely androany dia naniraka ireo mpianany i Jesoa hanao ny asa pastôraly, vitan’izy ireo soa aman-tsara izany ka niverina teo amin’i Jesoa izy ireo.

Isika koa dia mpanompo voairaka na dia tsy mendrika aza, tsy maintsy manatanteraka ny asan’Andriamanitra isika ary raha manao ny asan’Andriamanitra isika dia Andriamanitra no hanao ny asantsika. Maniraka antsika àry i Jesoa sy manome hery antsika ary manome fahefana fa kosa tsy fahefana entina mamoritra, mandrava na manapotika fa fahefana ho entina manompo ka tò teny mampijoro “génération mpanorina” isika satria izany ny angovo omen’Andriamanitra antsika vokatry ny fahafoizana. Henontsika ny Evanjely mitantara ny nataon’i Jesoa, nangoraka ny vahoaka izy, io ny toe-panahy tsy maintsy ho entintsika manatanteraka an’izany mba ho génération mpanorina isika. Izany ny anjaram-piainantsika, tsy maintsy mamahana ny vahoaka isika ary fantaro fa tsy isika no tompon’antoka amin’izany fa isika mitoetra ao amin’i Jesoa ary itoeran’i Jesoa ka afaka mamahana ny vahoaka. Io no fahagagana, io ny Eokaristia. Betsaka ny mbola milaza sy manontany aiza ny fahagagana ? Io no fahagagana sy henointsika bebe kokoa amin’ny Alahady ho avy Enga anie hanahaka an’i Jesoa Miandry Ondry, mahafoy ary manompo ireo izay hohamasinina niany ity sanatria tsy arak’ilay voalazan’i Jeremia mpaminany ao amin’ny vakiteny voalohany fa toy i Jesoa mikarakara ny vahoakany sy milaza amin’ireo mpianany mba hiala sasatra araky ny sahaza azy. Tsy ireo voahamasina ihany fa ny pretrantsika rehetra fa indrindra amin’izao sinaody izao mba ho mpiandry ondry araky ny irin’i Kristy tokoa ka vonona hikarakara ny ondry dia ny Eglizy hahatonga ny tolagna araky ny adidy apetraka amin’ny tsirairay fa indrindra amin’izao sinaoda

Manamafy izany ny hafatr’i Md Paoly tsy ho anay pretra ihany fa ho antsika rehetra, matoa i Kristy tonga dia tsy misy fanavakavahana, eritrerintsika olombelona ny fanilikilihana fa i Kristy nanolotra ny ainy nandatsaka ny ràny teo amin’ny hazo fijaliana dia mba hampihavana antsika, hampihavana ny tany sy ny lanitra, hampihavana antsika amin’ny

zava-boahary. I Kristy fihavanantsika. Izany no mahatonga antsika mamerimberina mila fihavaozana araka ny Evanjely ny fihavanana raha tiantsika ho tena soatoavina manampy amin'ny fanorenana ny Tranobe iombonana. Mila fihavanana sady kristianina no malagasy. Anisan'ireo irintsika ho vokatry ny sinaoda izany fihavanana sady kristianina no malagasy izany satria tena Pantekoty vaovao tokoa ka mitondra antsika amin'ny fanorenana ny FIANAKAVIAN-JANAHARY, FIANAKAVIAMBEN'ANDRIAMANITRA, FRATELLI TUTTI, OLO ARAIKY ISIKA JIABY. Ny fihavanana sady kristianina no malagasy no hampiombona antsika, haha oloaraiky antsika, hitoetra amin'i Jesoa isika sy itoerany koa ka handrindra ny fiainantsika araky ny sitrak'Andriamanitra. Zanak'Andriamanitra isika, manantanteraka ny asany ka mivelona bebe kokoa ny maha Kristianina antsika, ny maha Kristy mpiara -belona amin'olona antsika ka hiova ny fifandraisantsika samy isika, hirindra araky ny fandaminan'ny fianakavian'Andriamanitra izany ka hahitantsika vokatry tsara ary hilamina ny fiainantsika. Hampirindra ny fiainantsika amin'ny zava-boahary koa izany, toy izay ho mpandoro tanety isika handrava ny ala dia hiezaka isika hanavao ny fomba fiainantsika, hiezaka isika mba ny tontolo iainana no hanampy antsika hanana ny fivelarana, hanaja azy isika mba ho hajainy amin'izay hamokatra ny tontolo iainantsika ka hirindra ny fambolena sy ny fiompiana eo amintsika ary ho tena génération mpanorina tokoa isika eo amin'ny fiainantsika andavanandro. Tanteraka izany raha fola-kevitra isika ka hahafoy, hanompo ao anatin'ny fahamarinana. Hahay hifanasoa sy hifampitsimbina ka hikatsaka ny soa iombonana.

Ry Jesoa Tomponay ô, nampianarinao amin'ny alalan'ireo tenin'Andriamanitra androany fa ny fanompoana no zava-dehibe ka mangataka aminao izahay, aoka ho vahoakanao tokoa izahay, hahay hihaino ny teninao, hanatanteraka ny fampianaranao ka hiezaka tokoa hifanasoa sy hifampitsimbina izahay ary hikatsaka mandrakariva ny fanjakanao. Tsy misy fanilikilihana ao Aminao ka enga anie izahay ho olo araiky ao aminao tokoa

Ry Tompo mpiandry ondry tsara ô, ampianaro izahay hahay hanampy izay rehetra maniry hiombona sy hitady ny marina, ireo izay mivelona mandrakariva ny soatoavina, ny fihavanana, ho fihavanana sady kristianina no malagasy ka hitondra anay ho génération mpanorina, ho génération sinaoda ka hitarika ny olona hiara-dalana amin'ny fanorenana ny fianakaviamben'Andriamanitra, Fratelli tutti, ho Olo Araiky izahay jiaby. Masina Maria Renin'ny Apostoly, mivavahà ho anay, mivavahà ho an'ny pretra mba hanahaka an'I Jesoa hahafoy sy hanompo. Md Josefa Ray Mpiaron'ny Eglizy Erantany mivavahà mba hahay hanararaotra izao sinaoda izao izahay ka hanorina fianakaviana "eglizy kely". Ampianaro ny Ray rehetra ho Baba tahaka anao. Amen

Mompera Arseveka Mgr Benjamin Ramaroson